

Lorna C. Jansen-Varlack (AVP)

Juffrouw Yin May Wong a gana e premio maximo di Appel di Oro

ORANJESTAD - Diabierna anochi mi persona tawata presente na e gran celebracion di Appel di oro. Un celebracion cu por cierto a crece den e cantidad di nominado pa e aña aki.

E trabou di un educador ta algo hopi bunita y nobel cu ta existi un gran amor y hopi dedicacion.

E anochi aki tawata dedica na educadonan y teamnan cu a resalta den un forma excelente na un of otro manera, sea e tawata den un proyecto of den nan 'performance' personal. E aña aki nos por a ripara cu varios premio a bay pa educadornan trahando den Enseñansa Special. Palabranan di Pabien ta bay na tur e nominadonan y e ganadonan di Appel di Oro y mi mester agrega acerca un palabra di elogio pa mi ex scol, Scol Caquetio cu a gana un Appel di Oro pa e proyecto "Wela di Scol", un proyecto cu a cuminsa na aña 2000.

E wela di scol actual ta sra. Bep Bastiaanse, un señora hopi stima di scol y cu ta biba pega cu Scol Caiquetio.

Un pabien special tambe ta bay pa juffrouw Yvonne Altman, juffrouw Sharline Geerman

-Rodriguez ex coleganan di Enseñansa Special y juffrouw Yin May Wong ex colega cabe-sante di Scol Du'un Man.

Juffrouw May a gana e premio Life Achievement Award, e premio aki ta un reconocimiento di tur su trabounan, e curason grandi y su gran dedicacion durante mas cu 40 aña den enseñansa special. Juffrouw May ta cu pensioen awor, pero ainda e ta trahando incansablemente pa nos muchanan special. Pabien tambe ta bay na minister Michelle Hooyboer-Winklaar cu na un forma unico ta aprecia y reconoce e trabou di tur nos educadonan.

No ta facil pa scoge nominadonan y despues pa saca ganadonan, pero mi ta kere cu tur hende presente tawata contento y satisfecho cu e resultadonan.

Mi kier gradici y encurasha tur educadornan cu ta dedica nan tempo y nan bida pa educa y forma nos yiunan pa ta bon ciudadanonan mañan pa nan sigui cu e bon trabou. E trabou di educador ta un vocacion y e recompensa mas grandi ta ora bo wak bo studentenan despues y cu nan ta gradici bo pa e rol abo como educador a hunga den nan bida y formacion. ☐

